

摘藻堂四庫全書薈要

集部

欽定四庫全書薈要

集部

御選元詩卷三十



詳校官原任主事  
臣  
李斯咏

欽定四庫全書薈要卷一萬八千四百四十二

集部

御選元詩卷三十

七言古詩七

洪希文

癸酉六月十四日臂痛不自聊戲作短句

君不見將軍力挽十石弓勇沒矢筈寒氣隆又不見翰林醉揮數寸管敕賜宮袍天色晚古人文武具全材但見伎倆忘形骸君看朱亥椎晉鄙袖千鈞鐵何偉哉詩

翁不復作是夢磨墨研丹足吾用晴窓卷手不停披塗  
竄典謨箋雅頌天公何事不見憐坐失肩背生憂煎頑  
然自覺不屬體縱有杯杓令誰傳諸君莫笑老無力他  
日為郎能執戟

表士元

送信孚中住龍翔集慶寺

梵王宮闕皆名山金陵佳麗非塵寰龍蟠鳳翥氣磅礴  
樓臺縹緲煙霞間上人昔年住東海兩袖天香雲靄靄

磐陀石上迎朝暎潮音洞口瞻神采尋幽近復遊天童  
萬松徑裏支吟筇寒泉迸石影清淺高崖挂月光玲瓏  
祇今飛錫凌雲表妙高臺上天花繞秋風江漢動餘思  
何日留衣一傾倒

和劉德彛海棠

主人愛花如愛珠春風庭院如畫圖  
褰衣曲徑步花影翩翩夜月飛長裾  
海棠睡起春正美花貌參差玉人似  
主人吟賞夜不眠直欲題詩壓蘇子

程從龍

石壁山

熟湖周遭山歷歷諸山奇秀讓石壁石壁山上賢人隱  
石壁山下蛟龍蟄乾坤巧置山臨湖要使湖光照山色  
月來影浸玻璃寒日出煙凝蒼翠濕雲氣吞吐天冥冥  
巖阿花草春菁菁浮嵐晴助峯勢壯飛泉暝續厓猿鳴  
潁川逸翁遊憇處呼吸山谷養神氣芝田煙暖稻畦豐  
廂不就蒲輪致翁今日與群仙伍手植松柏翠環堵節

操松柏符貞堅壽齡石壁同今古

吳鎔

舟次硤石避雨古廟

漠漠春雲起巖谷白雲飛空亂如鏃牧兒狂走過橋西  
遠墅微茫數家屋浪高雪陣風忽顛移舟小泊古廟前  
坐待天回日西照江流不盡山蒼然

伊納克哈雅

武夷山

武夷山水東南絕行人往來慕高節千言萬語寫不盡  
舉頭一覽群峰列蒼松怪石勢欲奔峭壁雄崖怒相頡  
中藏萬古心就隱三寸舌神仙事渺茫俯仰愧中輟靜  
觀物理總紛紜只好投簪共樵說朝從鹿豕遊夜伴溪  
雲歇芒鞋竹杖任徘徊長嘯高吟恣怡悅飢餐古檜精  
渴飲幽泉潔我來武夷山老景成饕餮煩師借問九曲  
溪終南捷徑何優劣

施珙



徑山寺

迢迢雙徑躋層峰層峰高削青芙蓉嵐光掩映翠欲滴  
夜半見日扶桑紅梵宮去天不盈尺樓閣崢嶸炫金碧  
天香清徹旃檀林井泉寒鎖蛟龍宅煙霞欲曙撞華鐘  
數千食指如雲從塵埃不到清淨界誰能面壁參真空  
我來游觀春已老綠陰靜晝留芳草盤桓絕頂俯人間  
超然便覺乾坤小開襟久坐松竹陰不知山外斜陽沈  
西窓夜宿夢魂冷白雲流水皆知音山僧杯酒勤留客

白飯香芹薦芳席明朝興盡下山去回首青山兩相憶

葉可權

遂昌八景 錄六首

東閬曉雲

閬峰崛起蒼玉屏曉氣觸石天冥冥白衣挂樹山色濕  
宛如流水含春冰曙光穿林鶴初醒薄雲浮空結虛暝  
老仙醉卧石屋深起來但覺衣裳冷

清華秋月

飛閣戕戕睨空碧清氣逼人風露寂望舒駕月行青冥  
滿地金波悄無跡天色如水空塵埃寒光透室秋徘徊  
嫦娥對鏡作隊舞青鸞飛上瓊瑤臺

洗馬寒泉

將軍勇氣起吳越鐵馬追風汗流血寒泉一掬清戰塵  
六月人間灑飛雪雪花濺落馮夷宮霜蹠蹠月如游龍  
何須更尋渥洼種此水直與銀河通

釣魚清風

老翁扁舟弄明月洲渚無人鳥飛絕清風凜凜醒醉魂  
華髮蕭蕭吹白雪白魚如玉蘆花飛白浪萬頃堆琉璃  
雲臺舊業付流水一聲長嘯蒼苔磯

後墅春耕

濃雲壓樹春雨足土脈如酥秧水綠大兒後墅扶耕犂  
稚子前坡飯黃犢黃雲捲空桑柘疎鼓聲日暮鳴枌榆  
烹羊魚羔醉耳熱仰天拊缶歌烏烏

長安晚渡

平蕪斷楚迷行路野渡茫茫煙水暮孤舟隔岸呼不來  
落日寒沙點鷗鷺浮雲萬里空悠悠長安不見令人愁  
長安在西向東笑欲借兩腋天風秋

吳存

薦福山

昨日今日風日妍東舍西舍桃李連有衣且典洲上酒  
無衣莫喚湖中船羣兒竹馬走爭道誰家紙鳶飛上天  
豈無長袖公莫舞共對青春非盛年

趙穀

申鎮廟

凌晨策馬趨靈宮  
縈紆一經松蘿重  
兩山對聳忽開豁  
參差殿閣蒼煙封  
溪回路轉得平土  
雲間雞犬存莊農  
廟庭喬木巢野鶴  
沙瀨虎蹄遺新蹤  
仰觀絕頂倚霄漢  
陪山劒戟攢群峰  
霏霏嵐光翠欲滴  
深林綠動春意濃  
包含元氣蓄雷雨  
巨壑湛蔚藏神龍  
天香屢降新年穀  
有司時祀宜彌恭

丁仲倫

題明秀亭

離江東過昭州城城邊虛敞明秀亭昔人創意豈云偶  
愛此水秀山光明隔江荔浦雲橫嶺西山銅鼓煙迷頂  
萬劫金鐘古殿荒千尋玉井沈波冷往年城市連江居  
即今郊野無村墟淒涼三縣賦役少寂莫孤城樓櫓虛  
我曾十年攝其守防虞聽事重營久幾番舟楫重經過  
屈指年華數來九髭倪見我重傷神繁華一去如浮雲

府公俱是豪俊客謂當鼓舞新斯民青雲飄風惜時晚  
白日留顧下丘坂何人為我呼梅公山頭啼鳥山花紅  
一杯磊落澆心胸寫詩作向臨江風

卜友曾

題劉材之家子昂書映雪軒扁

吳剛粉月成瓊屑灑向人間沃春熱東風刮地清夢闌  
門外好山青不得白雲著雨飛難起曉來化作湘江水  
湘水娟娟照美人對此心開幾千里臨池落筆幽思多



白鬚道士來相過日斜寫得黃庭去錦籠却送山陰鵝  
山陰春盡美人老茂陵劉郎拾瑤草瑤草年年吹古香  
至今殘雪明松表

李復

題劉松年盧仝烹茶圖

老屋頽垣洛城裏綠樹團陰照窓几石牀散帙有餘清  
應是先生睡初起竹鑪火暖蒼煙凝碧雲浮鼎香風生  
白頭老媪不解事時聞蚓竅蒼蠅聲柴局日高為誰啟

有愧鄰僧頻送米長鬚裹頭始出門想為韓公置雙鯉  
松年圖此寧無情似覺七椀通仙靈何當更畫月初出  
仰天涕泗行中庭絕憐牛李方傾軋獨羨先生保貞白  
孤忠耿耿孰與同足配能詩杜陵客

蔣時中

大石山

大石山頭兀盤石下有靈物阻深宅珠宮弄月躍泉光  
墨池飛雲沛甘澤瘦藤倒挂古洞前仙壇秋靜明翠煙

龍兮冬卧春乃起素鱗聞雷飛上天

釣魚臺

仙人橋邊一塊石苔衣襤褸護雲碧相倚陵陽立上頭  
直下絲綸千百尺仙人今歸鬱羅鄉飛蓬想像臨滄浪  
若將巖渭等出處世間此事猶尋常

趙王廟

鼙鼙社日楓林鼓旌旗飄拂神鴉舞池藕無花岸草荒  
只有斜陽自今古古城西風吹袷衣下馬一訪真王祠

斷碑有字不可讀漢家舊事無人知

葉齊賢

題趙榮祿水村圖

坐窓不遨呻蠹竹兀兀那知皮生肉眼明見此水邊村  
浣我胸中塵萬斛荒山寂歷蒼煙斜驚風颯颯鳴蒹葭  
平沙暮寒羣雁起垂柳掩映幽人家風流王孫摩詰手  
妙處端如神所授等閒點綴皆精研怪底秋光生戶牖  
我家本住松江濱恍然一見融心神他年卜築遂君志

留取青山容散人

錢復

題燕穆之楚江秋曉圖

大船駕帆曉欲發小船載客客未絕行李怱怱不憚勞  
須臾會面須臾別江濤洶湧聲如雷名利縈擾心為摧  
楚天秋高何所有黃鶴磯頭多美酒便當吟笑解金龜  
勿向風波空皓首

何致中

招東塘若虎二丈

煙水涵月月欲昏  
冷光翠色互吐吞  
何人橫笛溪上樹  
吹落蘆花霑釣綸  
釣綸卷盡花不見  
月淡煙疎水如練  
白鷗何處忽飛來  
點破蒼茫秋一片  
對景有詩囊無錢  
賣詩欲倩漁郎船  
剪蓴斫鱸招吟仙  
扣船醉泛玻璃天

陳萬鈞

和韓廷玉夜過采石頭

江烟霏霏江月黑  
寒光照耀玻璃色  
當年江上錦袍人

騎鯨一去無消息天生此境絕險難驚湍九道奔空山  
今宵波平浪如砥舟行恍若圖畫間欲問燃犀是何處  
漁父鳴榔隔煙霧羨渠鷗鷺獨忘機占盡滄浪自來去

王子昭

詠練水

吳淞江上流來水鴨綠粼粼漾清泚東風無力藹清光  
一片縠紋吹不起夜來雨漲三尺深鵝鵲鷗鷺爭浮沈  
芹芽迸土抽白玉柳線拂浪搖青金錦袍仙人乘一舸

此處恍然天上坐閒聽漁郎唱棹歌遙指奇峰三四朶  
堤旁有人新結廬軒窓瞰水宜幽居村童喚渡去沽酒  
野叟就船來買魚風清月淡堪娛樂笑掬滄浪纓可濯  
何須尋訪武陵溪不必思吞雲夢澤下流香水正遲遲  
草邊得句何新奇地靈人傑萃斯景尚傳靈運嚴維詩  
桃花浪暖魚游處三十六鱗欲飛舉有龍若向此中蟠  
早為蒼生作霖雨

胡惟仁



題錢舜舉秋江待渡圖

夫容插天金陸離白波倒影搖參差江南西風渡船小  
山下落日行人遲楓林遙起漢陽思茆屋久負滄洲期  
漁竿老我底須老歸待白髮歸何時

潘士驥

黃山八景

錄一首

東浦暮帆

江亭影壓白鷗路半竿紅日光流駐鼓聲欲斷汐信平

風勒檣烏轉林樹江天漠漠夜濛濛黃帽出沒菰蒲中  
人家籬落有驚犬月吐未吐江涵空

顧華

水西亭

橫陽城西池水清鴛鴦鷺鷥交相鳴輕舸細網密如織  
幽人高卧池中亭昨夜涼風吹天末秋思先驚入毛骨  
城頭鼓角東方明起看青山半銜月

吳荃

洞庭秋望

洞庭遙在天之東放歌濯足秋正中君山倒蘸翠螺濕  
湖水直與銀河通一點兩點沙鳥白千樹萬樹霜葉紅  
美人娟娟隔秋水目極萬里雙飛鴻

余存庚

試劒石

旌陽古劒寒如冰化成煉就陰陽精鐵花亂雪星斗明  
白帝夜哭蛟龍驚一朝提攜試蒼石海風吹斷寒雲色

天地高低兩磨輪日月東西雙合璧  
劍鋒飛過石不知蒼松怒號起雷雨  
翠峽劈破青琉璃  
當年一斷成千古融液至今難綴補  
拂開蒼蘚勒奇勲  
好向岐陽作鐘鼓

王子東

中秋

青天化作白玉盤捧出七寶玻璃觴  
姮娥起舞太白醉  
如此風流胡可忘  
北斗酌取瓊河漿  
秋風製就芙蓉裳

龍吟泓下虎嘯壑誰能著耳聽啼蜚

王東

題文學館壁

主家池館臨官道門對琅玕如海島弟子讀書編綠蒲  
詞人琢句思芳草憶昨送客悲年華隔簾微雨東風斜  
春光滿眼忽自醉牆西一樹櫻桃花

蘇天爵

送都元帥舒魯杰雲南開閩

世祖神武真天縱萬里中華歸一統當時六詔亦親征  
大醜小夷咸入貢聖澤涵濡垂百年昆蟲草樹猶生全  
豈意狂童聳邊鄙戈鋌一掃成蕭然君侯累世稱將種  
落落奇才奮忠勇往歲乘輅諭蜀歸威名烜赫傳秦隴  
邇來天子褒前功璽書追拜明光宮腰間金符射白日  
胯下寶馬鳴春風金碧山高天拱北瘴雨蠻煙今已息  
元戎爲國保遺民日讀豐碑歌聖德

宇文公諒

題王叔明破窓風雨圖

劉郎讀書如學仙，朝不出戶夜不眠。  
時聞破窓風雨夜，正是徵心對聖賢。  
苔溪王子圖景象，敬亭山色青連天。  
執經念子最清苦，疊疊論道心相傳。  
雞鳴喈喈天欲曙，踈櫺蕭颯寒聲度。  
庭前漂麥總不知，屋上捲茅寧復顧。  
人生窮達那可預，玉堂金馬自有期。  
青藜他日夜相訪，却憶破窓風雨時。

張翥

題華山圖

華嶽連天向西起，瀕洞秦川三百里。  
巨靈高掌削芙蓉，影落黃河一絲水。  
雲臺霧谷巢神仙，羽衣金節時周旋。  
大笑失脚白羸背，歸來石上長鼾眠。  
千載悠悠寄元賞，耳孫風骨猶蕭爽。  
遠從丹丘渡滄海，追挹神蹤欲長往。  
何人想像圖真形，壘厓陰洞高林青。  
上摩金天之帝京，下攬玉女之明星。  
峰邪麓邪兩莫極，虎豹叫絕煙霏冥。  
仙家樓觀超然住，遙認微茫是征路。  
丹梯鐵鎖不可攀。



直喚茅龍上天去

發古城鋪

黃蒿古城風卷沙  
澗頭衰樹曉寒鴉  
歲云暮矣霜露積  
夜如何其星漢斜  
滿衣落月行人起  
馬上夢魂猶在家

范寬山水

憶昔往尋剡中山  
高明天姥相縈盤  
客路上頭穿鳥道  
行人脚底踏風湍  
早寒露重多成雨  
洩霧濛雲互吞吐  
僕夫相呼巖壑間  
空響響應人作人  
語溪窮岸斷地忽平

石門壁立如削成隔水無數山花明中有人家雞犬聲  
向來老眼曾到處此境俱作桃源行百年留在范寬筆  
水墨精神且蕭瑟上有翰林學士之院章恐是宣和舊  
時物林猿野鶴應自在今我相見猶前日時平會乞閒  
身歸一壑得專吾事畢

題趙文敏公木石有先師題於上

吳興筆法妙天下人藏片楮無遺者南陽詩律動江湖  
一篇才出人爭寫二老風流傾一時只今傳畫仍傳詩

清涵月露秋見影黑入雷雨寒無姿仇山黃鶴去不返  
苔溪鷗保歲俱晚好呼鐵爪夜錚錚刻向青珉照人眼  
題陳所翁九龍戲珠圖

兩龍頽頽出重淵白日移海空中懸一龍回矯一倒起  
側磔胡髯怒噴水大珠炎炎如彈丸爪底雲頭爭控搏  
一龍仰首逆鱗露兩龍旁睨蒼崖蟠怪風狂電浩呼洶  
天吳倅立八山動一龍後出尤崛奇半尾戲繞蜿蜒兒  
兒生未角已神猛一顧却走千蛟螭陳翁硯池藏霹靂

往往醉時翻水滴便覺天瓢入手來雨氣模糊渾是墨  
我嘗見畫多巨幅簸蕩驚濤駭人目何如此筆窮變化  
三尺微綃形勢足是翁前身定龍精故能吸歛奔精靈  
卷圖還君慎封鐫但空破壁飛空冥

題泰東山藏主十八開士圖

環瀛茫茫去不窮大鯨吹浪鼓颶風樓船如山不敢過  
況在汎葦浮蕉中西方十八大尊者徑度萬里猶乘空  
犀行水開蛟蜃露直下蹋入天吳宮龜魚背高孟錫穩

中流正與靈槎同怪頭達枿四罔象一單舁出龐翁公  
鼻端噓氣作飛塔舌上彈咒招降龍兩僧促膝披貝葉  
一衲裹足須山童雪毛白鹿岐角健斑尾黑虎雙睛紅  
最後坐禪如古佛從渠搏控何神通吾聞浮屠多善幻  
作詩自賞畫者工君不見海波橫潰鬼神惡我無其  
術安能東

息齋竹石古木為會稽韓季博士題

老竹葉稀多禿枝新竹碧潤含幽姿籜中龍子振春蟄

突出雷雨頭參差旁蹲怪石石罅裂裂處恍惚疑龍穴

山中有樹皆十圍活幹撐青死槎折霜皮食盡乾蘚文

半頂斬立雙桎分最後一枝身出羣垂枝倒走陰崖雲

李侯標致不可得小字親題別塗黑縱橫不在摩詰下

蕭爽直與洋州敵玉堂學士欣見之濃墨大書真崛奇

森然一片鐵石筆妙甚七字瓊瑰詞此詩此畫今兩絕

把玩微風動毛髮只應真宰泣雕鏤一夜山窓冷秋月

六月廿六日泛湖遇雨

忽雷瞋睨奔雨急山靈晝藏水仙泣蝦蟇下飲湖水立  
恍惚疑有蛟龍入疾風吹裂南天青芙蓉放香熏水腥  
吳歌楚舞方爛漫更盡花間雙玉餅

題林若拙畫孤山圖

孤山處士孤吟處水影月香餘妙句鶴聲叫絕陵谷秋  
修竹祠空幾愁暮白雲生根著湖水力盡西風飛不去  
何人鞭石下崔嵬中流截斷魚龍路丹青樓觀花如霧  
葵麥無情僅前度何似槎牙半死枝百年猶是咸平樹

荒煙壞柳斷橋冰宿葑田深散鷗鷺畫船歌舞不須更  
落落詩名自如故野人亦有滄洲趣安得數椽相近住  
長待天寒欲雪時杖藜來訪梅邊墓

成廷珪

送周草窓尊師歸廬山太平宮

匡廬之山仙所居銀河倒蘸青芙蓉三千里路昔一往  
十八社友今何如向來匡君結廬處至今海月懸高樹  
水流花落春復春洞府蒼茫隔煙霧西風蕭蕭吹短衣



賣藥修琴不歸去潯陽潮落海欲枯幾時再得麻姑書  
桂風不跨林下虎回仙肯顧盤中魚幸留神物守丹鼎  
近喜弟子迎飈車世間信有揚州鶴看汝乘之上寥廓  
晴窓須理白雲篇爽氣仍開紫霞閣袖中寶劍且藏鋒  
彭蠡小龍方睡著

題婁仲英山居圖

近代幾人畫山水郭畀無人朱敏死後之作者徒紛綸  
得骨得皮誰得髓聞君埽却山居圖令我見之心獨喜

前山環伏如虎蹲後山奔騰若龍起緣溪草堂星散居  
嘉樹陰陰雲旒旒豈無采藥古仙人亦有看書兩君子  
七十老翁居竹間老去胡為在城市君如有意肯相過  
貌得滄江弄清泚

送天長教諭孫允誠任滿歸金陵

憶昔君方少年日文帝潛宮曾一識龍飛上天不可攀  
圖畫空餘兩奇石閉戶讀書三十秋一線為官才領職  
天長令尹莫我知苜蓿朝盤勝肉食三年官滿來揚州

僦屋正近橫江樓門前車馬日如市談經講易皆公侯  
公侯滿座即沽酒典却篋內青氈裘鄉心苦憶長千里  
明日君當渡煙水中山李桓文中雄乃是君之渭陽氏  
深衣再拜如母存故宅重歸令客喜豈無舊業問松筠  
亦有清輝照桑梓青雲熟路君何如白髮滄江吾老矣

題畫史王夢麟卷

老翁窮居廣陵市四壁蕭然只圖史題詩不博一文錢  
枯瓦磨窮空費紙不如鄉里諸妙年翰墨遊戲王公前

解衣盤礴作山水一幅寧惜千金捐何人最得滄洲趣  
麟也於今稱獨步狂吟寄興肯相過畫我東橋竹居處  
題顧秀才所藏舟中看月圖

放船晚作南湖遊一葫蘆酒當船頭白雲裁衣紫霞帔  
松風吹髮寒飈飈少焉月出影零亂散作百頃玻璃秋  
有月復有酒不飲令人愁謫仙在何許空墓青山頭我  
家草堂月更好何如反櫂歸來休歸來休癡人不飲月  
亦羞素娥起舞我摘阮對飲豈必論觥籌千載與月同

風流

馬國瑞所題李龍眠畫赤黑二馬相戲卷子索  
詩因題卷後

君不見項王烏騅如黑龍蹴踏萬里煙塵空五年乘之  
勇無敵七十二戰收奇功又不見白門赤兔來向東神  
物終屬雲長公百萬軍中刺名將疾如健鶻追秋風龍  
眠居士新貌得毛色意態將無同沙場無人白日靜平  
坡淺草青茸茸雙蹄卓立欲變化兩尾突起爭豪雄

還君此圖三歎息此馬忽去難再得江南異事人未知  
又見騏驎出東壁

謝馮仁伯惠雙雞

可人送我雙鷄雞五色毛羽生方齊下堂呼兒解其縛  
意欲飛上茅檐棲山家得雞如得鳳寧與野雉論高低  
吾欲洗鼎試靈藥白晝聽爾雲間啼

劉商觀奕圖

茅生絕藝天下無何以刻此觀奕圖劉商易之亦驚倒

神妙似與龍眠俱松陰對奕者誰子豈非角里園公乎  
雲綃霧縠古冠佩童顏雪頂滄溟枯野樵旁立太癡絕  
歸來始覺仙凡殊斧柯竟化作塵土世間甲子真須臾  
老夫只解飲醇酒一著輸贏曾放手市廛有地寄閒身  
却覓南山橘中叟

題墨梅卷子

千年老枝生鐵色雪魄冰魂誰貌得三生石上見逋仙  
獨鶴歸來楚雲黑何郎垂老客揚州花前勸酒仍風

流江城吹笛月未落夢回一夜生春愁

題蘇昌齡畫秋江送別圖贈湘中江可翁

白沙江頭水楊樹正是秋風送君處海門日出潮欲平  
把酒娛君君不住楊公廟前聞鼓聲多少行人此中去  
江子於今空復情干戈滿地兵縱橫丹楓葉墮山鬼嘯  
黃竹叢薄飢鼉鳴湘中有家不得往時對此圖雙眼明  
兵部危太樸郎中家於臨川雲林山上請方方  
壺作雲林圖太樸索詩賦此



宇宙有此雲林山三十一峰如髻鬟雲林先生讀書處  
長松芝草非人間白雲裁衣亦自足青精製飯何曾慳  
朝光空濛起舒眺人跡迴絕窮躋攀青天蕩蕩海月出  
照見先生冰雪顏惟有方壺契幽眇貌得彷彿來塵寰  
宮中聖人正問道布衣召入蓬萊班玉堂給札縱揮灑  
金匱啓鑰煩修刪於今聽履上霄漢聖人未放先生還  
山中喪亂復何有飛瀑落澗空潺湲青林鳥啼野花發  
白晝虎嘯松風閒朝廷宴坐見圖畫亦應懷我雙佩環

方壺生在何處何不同來玉京住魚龍夜落河漢秋却  
泛靈槎共歸去

二月二十日同李希顏遊范文正公義莊登天  
平靈巖兩山希顏有詩因次其韻

闔閭城外草芊芊桃花杏花紅爛然物華兩岸眼零亂  
畫船春水如登天櫂歌却轉橫塘去山寺鐘聲日將暮  
長松夾徑風泠泠曾是先賢舊行路老禪蔬食作清供  
留宿白雲最深處瓣香復拜忠烈祠卮酒誰澆洛陽墓

清談朝士亦東來  
白髮野翁猶北至  
曉乘竹轎度羊腸  
地豁川平還散步  
斬王墳上無紙錢  
却讀殘碑不成句  
一羣山鳥自驚飛  
無數野花空媚嫵  
此中俯仰二十年  
一廢一興皆可舉  
濡毫拂石重題名  
搔首臨風謾懷古  
人生身後可奈何  
欲乞南峰一坏土  
山靈有意肯相容  
書券便當酬地主

夜泊陳店舟中寫懷兼簡雲林高士時張孟膚  
同舟

封門曉發吳淞船  
手把傳符津吏前  
五年別家走未已  
素髮蕭蕭垂兩肩  
小龍江頭舊遊處  
東家西家爭招延  
忽忽會散等過鳥  
風吹湖水春無邊  
雲林高士獨不見  
倚篷四望心茫然  
驚湍疊浪豈作惡  
渚花江草仍爭妍  
夕陽收港泊陳店  
入市買魚燒荻鞭  
蓉城公子今最賢  
賦詩行酒能周旋  
一談一笑燭欲盡  
野戍不聞鐘鼓傳  
却憶山中小兒女  
如此月明應未眠

和楊孟載春愁詩韻錄寄楊鐵崖

小窓病酒厭厭卧春色三分二分過仙人謾織藕絲長  
金銅難補菱花破花間黃蝶也雙飛葉底青梅纔一箇  
綵筆題詩人未歸愁腸一似車輪大

長江送別圖送周平叔之通州丞

福山蒼蒼倚天碧狼山巉巉生鐵色兩山當江作海門  
力盡神鞭驅不得滄波萬里從西來楚尾吳頭天一碧  
陰風轉地鯨怒翻黑霧連空龍起立來舟去楫不敢動  
袖手旁觀唯歎息扶桑浴日飛上天百怪潛消杳無迹

水光鏡淨山亦佳目送雲帆高百尺青霄要路君既官  
白首窮途我猶客煙中隱隱見孤城令我思鄉心轉劇  
驪駒歌罷將奈何倚杖江南望江北

李孝光

湖山八景

錄四首

沙頭酒店

陌頭楊柳金蟲落雨過桃花香漠漠沙堤小市如新豐  
阿姬十五當壚惡縷金半臂雙鴛鴦翠杓銀餅喚客

嘗嘶殺門前五花馬羅敷有夫空斷腸

山頂樵居

隱者避人如避虎樸素衣冠自中古  
長老嬉遊類小兒  
一生不識持門戶南山阿婆許嫁女  
北山老翁自迎婦  
野花竹葉並銀釵山中黃金賤如土

秋江漁火

八月九月風氣肅白波如山楚天綠  
蒼蒼夜色入蘆花  
船泊中流燃楚竹夜半起坐寒颼颼  
遙見驚飛雙白鷗

鱸膾蓴羹入吾夢扁舟去趁三吳秋

竹引流泉

山頭窪蓴積霜雪銅餅持鮓療飢渴汝家阿段太憐君  
斬竹來從虎豹羣傳聲夜落青雲濕坎中已作糟牀泣  
回首碧山心獨苦行逐蛟龍作雲雨

鑑湖雨

越角鑑湖三百曲雨餘曲曲添新綠八月九月風已高  
詩人夜借漁船宿漁翁城中沽酒來筐底白魚白勝玉



當時賀老狂復狂乞得鑑湖此生足

和叔夏寄童質夫

溪頭春水綠欲沽溪上行人馬蹄滑溪山周市空翠香  
駐馬看山惜不發有客有客蒼髯睂蘭襟蕙帶光參差  
手攜鯉魚壓清酒勸我且復留斯須道旁廢垣蘚花裂  
昔人富貴春雲滅此時不飲將奈何為君醉倒溪頭月  
舟中為人題青山白雲圖

江氣鼎鬪如蛟龍曉風吹落金芙蓉神女凌波洗雲去

暮為行雨陽臺東朝來白雲散白石小姑蛾眉翠欲滴  
老蛟化為百歲翁彭郎磯頭夜吹笛

秋曉角

青天蕩蕩吞孤舟衆星熒熒明復滅城中雞鳴如蒼蠅  
城頭畫角哀鳴裂八月九月風驚沙窮邊夜夜吹梅花  
四方無事卧笳鼓行子何用思還家

墨梅

銀蟾呵春墨花碧香落江南濃欲滴孤山招得老逋魂

白鶴歸來楚雲黑王孫歲晚客京華衣上緇塵深一尺  
小姬未嫁怨東風夜夜高樓吹鐵笛

覺此山和尚新住持雙峰作此贊歎之

雙峰矗天佛頭碧雙峰插地滄海黑道人入山化作雨  
藍玉亭邊深一尺光明白氎紅鬢衣說法香南連雪北  
紫皇香案九重天日照麒麟生五色

宿雁山下作瀑布詩寄徐仲禮

金臺刺天一萬丈湧出海底開青蓮下有三千六百地

軸相鈎聯壓徧東南地欲折白龍捲海飛上天雷公擊  
鼓馮夷鞭龍漉入江化為石巨靈扶起太古色應真晏  
坐天人來十八招提若幻出長風吹開天骨碧

張葵齋所藏江山風雨圖

元氣菌蠢生蛟龍銀河倒插金夫容九疑正在九州外  
碧樹悄悄連丹楓上有萬古不死之明月下有掀天巨  
浪之長江有客有客陸龜蒙往來江南成老翁天地無  
家屢回首放船去踏江上之青峰船頭十日懸青雨風

拔銀山映東戶山墮沒鵲落中原水作巴蛇走全楚向  
來英雄定黃土空遺綃素流今古天地一合如金甌萬  
歲千秋奉明主

次歐陽公效孟郊體看綠字韻題慶上人萬竿

圖

白石如白羊起踈變化速芸芸籜龍雛身與雲俱綠嗟  
哉兩神物曾不受迫逐我有囊中方因之試餐玉袖中  
釣鼉手十年夢漁屋鳳凰千仞姿未省一枝足自我見

此君夜夜翻凍醪踏倒山中玉板師春風大笑成三宿

送周生

二月已暮江水深春風吹折行人心山頭明月落未落  
杜鵑夜半莫哀吟泊船上有青楓林

三月欲來花繞陌又唱銅鞮送行客男兒莫爾可憐生  
男兒生身好顏色拔劍起舞雞鳴柵

題周耕雲為蕭元泰畫龍虎仙巖圖

龍虎之山仙所寰我昔夢寐遊其間乾坤風氣結沖秀

中有正一元都壇羽人授我九節杖林磴窈窕窮幽扳  
金宮蕊殿起寥廓翠厓丹巘深迴環峰頭時飄白菡萏  
石上誰種青琅玕諸巖一覽二十四總似瀛渚蓬萊山  
清溪浮空引雪練遠岫隔水來煙鬟就中仙巖更奇絕  
上有玉樹皆團欒虹光半夜出雲杪云是石室韜神丹  
欲求刀圭已衰疾羽人去我如飛翰褰裳澗曲采芳杜  
斷猿疎雨春山寒覺來俗事日滿眼歲月冉冉隨驚湍  
會稽蕭君忽相訪笑以此圖令我看夢中羽人貌真似

而我別後鬢毛斑題詩聊復記疇昔願拂塵服高轡鸞  
與朱希顏會王山人家書其壁

小山培塿溝中蛙大山宛轉行黃蛇風吹海霧麴塵起  
山頭紅樹紅如霞東來明月無根蒂我行忽至山人家  
山人好事喜客至賓客滿屋書滿車眼中頓有玉人兩  
膝上文度鳴嘔啞祝婦家傾伯倫釀驅兒手煮盧仝茶  
彌明結喉石鼎句禰生頓足漁陽槌原上脊令古兄弟  
山中雞犬秦桃花百年富貴謾稱意歲月袞袞春江波



跼顏夭壽不足惜蟲沙猿鶴令人嗟我起勸爾一杯酒  
但持仁義終身多今夕何夕且樂飲奈此明月青天何  
和陳叔夏章字韻詩送此山師

天孫織錦當朝陽銀梭軋軋回天章麒麟鳳皇映東壁  
煌煌珠笈帝所藏分送天人寶華雨紫狐夜泣龍髯塵  
袖間明月大如屋老蛟來飲銅盤露天孫何曾辛苦為  
東風吹綠雲錦機娉婷盈盈渡河漢世上那有新相知

北風寄陳輔賢

蕭蕭北風吹客船月未出海天蒼然客子放歌脚扣舷  
蕭臺東頭天裏海蕭臺西頭山刺天君行西過釣臺口  
寄謝江邊老病叟坐看雲臺落人手丈夫豈敢愛微軀  
奈此黃花一尊酒

十五夜泊舟渚磯

采石不見李太白騎龍上天吹紫笙天上甚樂苦無酒  
東游十二白玉城蛾眉亭下明月出牛渚磯頭春水生  
一鶴西飛向何處惟聞萬壑松風聲

周伯琦

賦得灤河送蘇伯修參政赴任湖廣

清灤悠悠北斗北千折縈環護邦國直疑銀漢天上來  
搖漾蓬萊五雲色蛟龍變化深莫測金蓮滿川淨如拭  
鑾輿歲歲兩度臨雨露同流草蕃殖長亭短亭來往人  
朝夕照影何曾息相君親授臨軒敕紫駟嚼齧黃金勒  
却從江漢望龍岡三疊晴虹勞夢憶

貢師泰

金谿縣葛烈女廟

金谿廟前草離離金谿廟中兩女兒青山猶似舊時色  
流水不盡行人悲翠翹珠珥垂孔雀廟門深鎖藤花落  
靈風蕭颯半空來髣髴音容啟珠箔憶昔里中初賦銀  
銀賦日急家日貧父身撈掠痛欲絕女心憤結何由伸  
鬼狐夜號天漆黑大冶騰騰火光烈可憐踴躍雙蛾眉  
變作兼金白如雪君不見緹縈上書更肉刑木蘭遠赴  
可汗兵固知才略過男子不如孝女英烈能捐生又不

見湘妃江邊淚斑竹韓憑冢上連理木固知精誠可相  
召不如孝女感化獨神速赤龍並駕參嬋娟萬古日月  
懸中天人生雖死名不死吁嗟丈夫應媿爾

為郭宗道祭酒題韓滉移居圖

田夫生長田間住辛苦移家向何處老牛帶犢驢引駒  
婦姑騎過前村去牽衣裏兒囊在肩瓠壺瓦缶縣蒲羈  
一童鬚髻隨左右兩髯偃僂相後先新來茅屋徒四壁  
東隣西隣不相識種田未了主家租又恐官司著差役

唐朝宰相韓晉公念爾流離多困窮當時落筆豈無意  
正欲廊廟知民風願得轉徙安居室周公亦曾作無逸  
分題得姑蘇臺送吳元振赴江浙省左丞

姑蘇城外江水綠姑蘇臺是吳王築吳王宴罷越王來  
館娃夜冷宮門開落花飛去春無迹江邊却起姑蘇驛  
馬頭旌節何皇皇候吏傳呼謁道傍孤山梅白堤柳黃  
相君入坐中書堂

題山水圖

前山後山雲亂起山脚入溪清見底溪南更有山外山  
散如浮塵聚如米老楓枯櫟葉紛紛下有人家深閉門  
釣絲欲收風浪急却迴雙艇來籬根老翁曳杖行偃僂  
一童負樵一童斧筆端意度盡神妙卷裏衣冠自淳古  
商周寂寞經幾秦後來莘渭寧無人茫茫耕釣去不已  
武陵竟隔桃花春

題江陰丘文中山水圖

老龍渴飲池中墨飛上半天成削劣雲煙著地凝不開

白晝神驅太陰黑，筆端巧奪造化功。  
咫尺峯巒千萬重，長林似灑楓葉雨。  
虛亭不動松花風，隔江更有山無數。  
江上扁舟纔半渡，他年白髮許重來。  
為君別寫容城賦。

送張介臣伴讀歸省濟南

雲天迷濛日脚消，雪花散亂風飄蕭。  
重裘著體如壓鐵，呼酒不來寒正驕。  
東風匹馬去千里，仰視王屋當雲霄。  
到家方慰母心喜，入門更聽兒啼嬌。  
華燈夜照舞衣熱，彷彿鳴鳳和笙簫。  
暗黃著柳垂長條，虎闌春信趣還鑣。



一杯遲子城南橋

題二馬圖

鐵喙駟連錢  
驄何年墜影江  
水中蒲梢西來  
八尺龍天閑  
十二為爾空五  
花雲錦吹東風

送涇王府蒲司馬西還

重弓滿引鳴鏑  
和翻身躍馬渡  
長河日高射獵  
王半醉軍中司  
馬功最多白狼  
西來獻天子腰  
間玉龍鱗甲紫  
寶書緘奏動神  
京黃封御酒貺  
邊庭弦蒲汭鞠  
幾千里

芳草萋萋春似水鳥聲山色不勝情枚生作賦才難比  
題牧牛渡水圖

兒騎牛兒騎牛兩牛渡水當中流一牛帶犢臨沙洲沙  
洲泥深沒牛足中流浪高拍牛腹長繩墜手衣裹身前  
者起顧後俯伏牛背敲傾不自由誰云穩比萬斛舟待  
兒出險走平地畫圖忽落東海頭東海頭飯牛之子曾  
封侯

題顏輝山水

蒼龍渡海成疊嶂  
劣崩西來勢何壯  
盪摩日月噓雲煙  
回薄風霆起波浪  
懸流晝夜相舂撻  
恍惚銀河落天上  
橋橫霞嶺類天台  
谷隱龍湫疑雁蕩  
若非華蓋及武夷  
無乃仙都與秦望  
參差飛觀倚半空  
錯落長松高百丈  
煙橫絕磴畏崎嶇  
路出平川喜夷曠  
野老朝畊屋角雲  
漁翁晚釣籬根漲  
偶隨鶴舞抱瑤琴  
猶恐猿啼驚蕙帳  
畫師盤礴精天機  
元氣淋漓歸意匠  
毫芒點染遠近間  
咫尺卷舒千萬狀  
三年老我東海隅  
立馬看山每惆悵

麻姑敬亭曾見招何日相從脫塵鞅

盧琦

鞦韆

綠窓美人閉深院燕語鶯啼春事半  
畫闌睡足四無人  
空與東君說幽怨綵繩嫋嫋挂青煙  
羅襪纖纖翩翠袖  
紅妝高出牆頭花繡帶斜飛亭際柳  
香風蕩漾春誰主  
願學飛仙飛不去  
黃昏溪月浸梨花  
背立鞦韆悄無語

燭

海棠庭院日西入絳蠟凝香高一尺銀臺照夜春溶溶  
金屏繡褥光相射洞房寶扇雙鳳花了鬟纖手籠絳紗  
蘭燈交輝奪明月玉杯照影傾流霞高堂舞袖沈香暖  
歡娛未盡春宵短長風飈蕩落花多野鳥啼春動幽怨

秋蚊

茉莉堂前月華吐飛蚊擾擾晴雷怒深閨小玉焚椒蘭  
繡幕穿簾柳花度芙蓉夜卧銀燭滅綠紗如煙罩香雪  
潛身飛入羅扇風耳畔營營宵不絕瓊肌一啞雨夢回

玉腕斜批守宮血屋外寒蟬自清素夜夜長吟飲花露  
至正己亥夏予遊壺山宿真淨巖即景賦詩奉  
簡古道了堂二師

六月翠壺山下客凌晨登山如絕壁支筇徑上真淨巖  
頭上青天纔咫尺高僧十載棲巖幽啟扉相見還相留  
欣然坐我斗室底滿室嵐氣生清秋開窓一覽數千里  
滄海微茫等杯水客帆來往煙雨中人家遠近林巒裏  
平生讀書苦不多時事如此將奈何蠅頭蝸角付一笑

會當結屋山之阿

望湖亭

望湖亭外波蕩蕩  
漁舟客櫂頻來往  
好風卷雨黑雲收  
十里湖天平似掌  
長川極浦秋雲清  
錦帆自信牙樯輕  
蘭橈制手动龍蛇  
影擢歌驚起鷗鷺  
盟昔是席上珍  
今作官中客  
兩載遊帝京  
雙鬢半垂白  
三衢非為嬾  
折腰楓城聯蔭  
桐陰色黃金  
孰鑄子期形  
白玉空教和  
氏泣丈夫氣  
既無憚勞  
對此江山趣  
自高浩歌長  
嘯天地窄  
笑

殺馮唐歎二毛

朱德潤

偕張清夫登道場何山

松楸夾道雲迷麓細泉無聲走空谷捫蘿倚磴行轉緩  
百折峰巒看未足鷓鴣泣雨山漫漫懸崖老樹蒼虬蟠  
登樓倚檻俯木末漱泉汲澗分餘湍老僧延坐話夙昔  
夜半談空屢前席自言久是茲山主殿下長垣屢封植  
山頭碧瓦如連環曾聞仙客來雲間猿驚鶴怨知幾許



伊吾聲斷愁空山明朝煙雨開晴旦折花臨水春將半  
我亦歸山讀故書何必懷仙生浩歎

題張參政所藏驄馬滾塵圖

盛唐太僕王毛仲八坊分隊三花動當時畫馬稱曹韓  
尺素幻出真龍種玉花照夜爭新妍一馬滾塵髮尾鮮  
昂頭不受金絲絡汗血輾沙生晝煙翰林妙寫不減古  
名駒染出清豪素延祐君王賞駿材金盤賜帛開當宁  
時清處處生驪駒何必漢朝稱渥洼王良幸勿嗔蹏齧

一躍天衢千里沙

仙山圖為趙彥昭賦

空同之山戴斗極，壘嶂橫陳開碣石。  
翠崖丹磴互低昂，複閣層闌轉空碧。  
碧桃花落笙聲幽，雙成吹玉彩鸞謳。  
跨鳳騰雲去無迹，清猿啼斷層崖秋。  
霞光隱映山長在，寰海茫茫隔煙靄。  
舊游仙侶謾招呼，誤落人間幾千載。  
吳爭越戰何可數，束書欲問桃源路。  
畫圖空見避秦人，隔水漁郎不相顧。

陪于思庸訓導登道山亭觀梅

用坡仙韻

道山亭下梅花村坡仙作詩為招魂明姿照人隔寒水  
瘦影帶月欺黃昏先生頗厭郡齋冷持書晚約窺山園  
松風吹香清人骨地鑪煙銷酒初溫孤標已出群卉上  
故遣雪意迷晴暎和羹結子時較晚先傳春色來衡門  
天寒谷幽翠袖薄豈知青鳥能傳言明晨看花重有約  
呼童掃石羅清罇

觀內廩洗馬

黃雲灑雨沙場秋灘高水平凝不流曉霜襲透蒼駝裘  
圉人浴馬津水頭綠驃連錢雙驂騮日光射波脂膩浮  
青絲脫鞚黃金鈎輕爬短刷濕未收三花翦鬃平且柔  
籊雲駿氣將無儔束芻斗豈馬羞茫茫豐草生林丘  
霜蹄胡為踏長楸振鬣一躍期天游

宿楊大使書齋晨起畫扇

關河月落星垂空怒蚊如雷窺帳中屋頭初日炎霧起  
坐想冰雪撐心胸人間能消幾炎熱竹馬小兒成老翁

百年事過只如夢癡蠅著人欺睡濃素紉入手意蕭爽  
揮斥酷暑無餘蹤昔聞誤筆王大令我亦寫作雙長松  
他時愛畫不畫扇梧桐葉落生秋風

為鄧靜春作幽谷圖

山深冥冥溪谷陰怪石突出當重林迴壑奔流石礪礪  
寒霧噴薄浮輕岑猿猱飛攀山欲立懸崖老樹蒼鱗濕  
有客擔簦負長笈欲行不行驢脚澀風吹征衣天欲暮  
旅館不逢前沮渡此際遙知行路難却向今朝畫中覩

春暮感懷

辛夷花落芳林靜  
啼鴂聲乾雲欲暝  
暖風吹雨綠陰生  
梅子心酸猶未醒  
書窓睡思將無憑  
故山幽夢青崢嶸  
平生自有泉石念  
寸祿無干何用名  
薰天富貴那足恃  
厚祿未為身後計  
破垣發屋笑王涯  
長棄勲名如脫屣  
題石崇錦帳圖

洛陽金谷園中花  
雕玉為闌繡作遮  
琉璃器多出珍饌  
瑪瑙街長行鈿車  
椒房塗香貯歌舞  
曳珠珥翠籠輕紗

珊瑚扶疎三四尺王羊貴戚爭豪奢那知花淫風雨妬  
古來山澤生龍蛇嬋娟墜樓寶玳碎月明夜半啼驚鴉  
雪中觀漁

同雲蔽天江茫茫門前雪高一尺強漁人並舟鼓雙棹  
大罾入水瑤繩長老翁哺兒姑曳網甕頭酒熟炊粳香  
醉中不脫一簑玉仰天叫笑鳴雙榔自從水利算湖漑  
漁鹽大載需官場畊桑雖佳租稅急縣前胥吏如貪狼  
江天四時各有象人世反覆多炎涼勸君更放雪中餌

飢鯨挂鬣江中央

八月九日武林達宣差招宴時武良弼太守廉  
山御史同席

八月九日天氣涼老仙會客登高堂會稽太守廊廟器  
黼黻政事多文章烏臺御史守風節州牧縣令皆循良  
盍簪偶爾動清賞開筵四座羅壺觴太元真人著宇秀  
辭辨析理推毫芒舉杯問答興未已歌舞落日增輝光  
嬌鬟戲作猛將躍大娘解演詞人狂冰絃戛擊箏雁度



玉板拍裂鳴鼉轟嬋娟鬢驪珠婀娜細腰裙動金琅璫  
霜糖炊粳薦膏膾海錯飮盤傳蔗漿蠟炬照席飛銀燼  
桂花繞屋吹天香人生得意須盡醉酒漬啼痕秋夢長  
東山謝傅等陳迹洛陽金谷何茫茫月明上馬清露下  
無使樂極生悲傷

題李唐村社醉歸圖

邨南村北賽田祖夾岸綠楊聞社鼓醉翁晚跨犇牛歸  
老婦倚門兒引路信知擊壤自堯民季世龔黃不如古

披圖昨日過水南縣吏科徭日旁午

山水屏圖詩

丈夫無奇才雖顯不足名高山乏秀麗兀立培塿形况  
乃畫圖間兩奪造化精中堂素壁本虛靜誰令揮灑研  
丹青女媧五色不補天神功鞭石來蒼冥驅山奔海入  
紉素扶輿之氣青熒熒赤城霞彩千峰明洞庭湘浦雲  
英英風帆晝捲瀟湘雨黃葦堆灘插漁罟獨木莊前野  
水流夕陽川上欹橋渡大峰倚天接天門又如特立太

華尊羣山趨俯不敢動山前星辰手可捫我欲託身上  
山巔丹梯百尺何由緣畫興欲來別有趣顛毫醉墨飄  
如仙仙成却服九還丹兩腋清風飛上天


御選元詩卷三十

謹案卷三十第十四頁前八行舒嚕舊作述律今  
改




謹案第十九頁後一行畫船歌舞不須更刊本不  
作只據張翥蛻菴集改

第三十六頁後一行芳草萋萋春似水刊本萋萋  
訛淒淒據貢師泰玩齋集改







總校官庶吉士臣侍朝

校對官檢討臣蕭九成

謄錄監生臣朱文佐

欽定四庫全書薈要

集部

御選元詩卷三十一

詳校官原任主事

臣  
李斯咏



欽定四庫全書薈要卷一萬八千四百四十三

集部

御選元詩卷三十一

七言古詩八

陳顯曾

題溪山勝槩樓

江南二月羅衣裳  
藤花滿地山雲香  
背人小燕撇波去  
朱簾白日遊絲長  
蒲茸綠淺芹芽紫  
沙上輕煙濕飛雨  
美人遙睇木蘭船  
一夜相思隔春水



程文

送文仲德之臨洮帥府經歷

吾聞洮州綠石堪為硯能淬筆鋒如淬劍地靈大寶愁  
鬼工埋沒塵沙羞自獻羌童目悍手足鮮掛弓走馬惟  
臨邊雄藩令嚴烽燧息鼓角晝靜旌旗懸幕官性文不  
好武要使西羌化東魯詩書埋案夜生輝親寫封章上  
天府豪猪之靴青兕裘時平不願萬戶侯但得洮州綠  
石硯歸來泚筆立螭頭

鄭元祐

姑蘇臺

城西高臺高百尺傳是吳王舊遊迹  
百花正開西子醉明月芳洲照清夕  
嬌顏如花醉王側城上烏啼曉星白  
歌鼓聲消醉未消越王已將兵來朝  
鉞金撾鼓殷天地兵敗可復棲夫椒  
吳人遺恨化潮汐暮往朝來箭涇直  
不然自可君甬東何用蕭蕭馬嘶驛

漁莊

濠上春晴花朵朵施周強智魚與我爭如顧循讀書倦  
馭沓浪花宵鼓柁船頭列炬船尾唱繩擗如雲翻水上  
并刀斫雪鱠縷飛拍拍茆柴薦新釀莊上東風柳欲綿  
鯉魚吹浪迎歸船由來名教有樂地看書却埽消殘年

東坡赤壁圖

奎星墮地不化石化作盤天老胸臆清禁森嚴著不得  
半夜吹簫過赤壁百億魚龍不敢聽萬古東流月華白

送性僧遊徑山

憶昔苔溪登徑山童孩無識空躋攀但見五峰削玉倚  
天外兼聞衆木戛樂下雲間振威何人喝石裂行脚有  
僧挑月還神龍依禪井水立杜鵑啼血春花殷孤煙中  
分白窈窕一雨忽洗青孱顏何時復至舊遊處行蹤應  
有蒼苔斑願從師去不可得起看蘿月空彎彎

曹文晦

書所見

柳黃鶴袖桃花裙釵梁呀金光射人顏如花紅語如燕

氣態直與春爭新出門心事多於草愁滿雙蛾為花惱  
昨夜春風破碧桃過眼春光二分老為誰微步過垂楊  
臨水插花青鬢光回頭貪看雙蝴蝶不意前逢馬上郎  
宿水車田舍

水車山前溪月白去年曾作寒夜客主人團坐竹爐紅  
老姥燒茶多喜色今年又宿鄰西家柴門臨水竹交加  
眼前風物總如舊只有疎籬梅未花平生到處多清興  
聊對沙鷗發新詠明年強健又重來沙鷗笑我胡為哉



題筠軒友竹詩卷

有竹無人辜負竹有人無竹令人俗二者如何可得兼  
惟有君家清意足君家竹圍青玉城君家有人冰雪清  
幅巾相對弄明月是人竹俱忘形東隣種桑富紈綺  
西隣種花蜂蝶聚豈無紅袖引壺觴那得詩人叩門戶  
詩人愛竹如愛賓娟娟秀色詩爭新君當開徑埽白雲  
相逢不是塵埃人

卞思義

溪山春雨圖

野人結屋臨溪上  
白雲生壘嶂城中車馬自紛紜  
朝聽樵歌暮漁唱  
雲林霽靄春日低小橋流水行人稀  
桃花落盡春何處  
風雨滿山啼竹鷄

陸德源

送陳敬初秀才北上

江南八月鴻雁飛  
故人挾策遊京師  
為郎作傳雖可期  
老懷與爾寧分違  
憶昨同舟風雨夕  
胥江委蛇嚴灘白

紫陽之山千里隔何曾笑我微官縛歸來吳城剛半年  
攬裙結佩仍周旋陳膠漆非偶然拍肩笑語忘其顛  
秋風蕭蕭吹去舟征衣蓐食還依劉芙蓉照波生遠愁  
欲別未別難為留玉堂金闕有耆舊草詔紬書常在手  
乘時薦剡如轉丸兀兀兔園非所守子之行兮良不苟

瞿智

賦得姑蘇臺送周仕宣南臺典史

高臺鬼鬼插天起勢壓雄城三百里雲窓霧閣迷絳煙

日日吳王醉西子桂膏蘭燼燒春雲錦絲瑤管空中聞  
甲兵重來破歌舞粲齒脩眉散如雨雙鉤帶血不敢飛  
城荒草碧春風吹祇今惟有臺前月曾照吳宮花發時  
慷慨悲歌歎陳迹霜鳥怨啼霜葉赤明朝送客過鍾陵  
西望茫茫五湖白

趙渙

暇日同仲穆諸公遊道場山和東坡韻

道場山深美林麓坡老文章照巖谷簿書休暇得良朋

載酒幽尋歡意足朝寒嵐重陰漫漫石頭路滑青屈盤  
仰瞻孤塔倚島漢俯聽絕壑鳴飛湍老僧愛客煮茗出  
暫與閒雲分半席自言住山八十年夾道長松手親植  
家人好事攜歌鬟為予嘯傲泉石間壺觴到處即傾倒  
何必西湖與東山郡圃花開少晴旦屈指春光已過半  
百年行樂能幾何爛醉芳時莫長歎

聶鏞

題碧梧翠竹堂

青山高不極下有仙人宅仙人築堂向蹊路鶯啼花落  
迷行跡翠竹羅堂前碧梧置堂側窓戶墮疎陰簾帷卷  
秋色仙人紅顏鶴髮垂脫巾坐受涼風吹天青露葉淨  
如洗月出照見新題詩仙人援琴鼓月下枝上棲烏絃  
上語空階無地著清商一夜琅玕響飛雨

毛南翰

竹陣圖

坡翁胸次何礫礫雜還千矛攢萬竒一生長為竹寫神

落紙簫簫森可把青雲糾糾曉相壓蒼雪紛紛晝仍墮  
長鎗磨戛颭陸沈細甲鈎連紐青鎖此幅分明作陣圖  
左右中堅皆勇果正如絳侯翦諸呂麾下健兒齊袒左  
又如赤壁走阿瞞一炬怒鑪黃蓋火囊沙壅水待半渡  
摩壘斬關知彼我此君意氣有如許詎可奔北降老可  
金蓮道人亦好事遠遊愛鼓滄浪柁斛珠不買青樓娼  
博取歸來云頗頗敲門拄杖棄不用硯几書屏邀對坐  
客來無詩不與語琢腎雕肝誰得罷一朝去主芙蓉城

付與郎君重封裏我來愧在作者後品畫題詩忘縷瑣  
周彝商鼎篆奇譎趙壁隋珠光璀璨摩挲病眼拂卷素  
玉節金枝紛婀娜雨中三日不出門四客相看足如跛  
就中兩客程與陳吐辭清新曾帖妥回頭動是三十霜  
快讀令人夷坎壈長潘短李炳貂豹紫巖汶陽嗔果羸  
我詩乞與作衙官擲筆亂峰青朶朶

陳高

山中讀書圖



遠山如藍近山綠前門蒼松後門竹幽人讀書棲石根  
有客拏舟訪溪曲白雲冉冉落虛窓清風泠泠散飛瀑  
林泉深處隔紅塵便欲相依結茅屋

題太白納涼圖

六月炎天飛火鳥土焦石爍河流枯邇來衰病更畏熱  
呼叫欲狂揮汗珠飲冰嚼藕廢朝夕小室如爐眠不得  
閒將圖畫懸四壁漫想深山好泉石就中此圖尤絕奇  
青林飛瀑吹涼颼何人展席坐蒼蘚乃是謫仙初醉時

露頂裸程投羽扇仰看雲生白成練松陰如雨毛骨寒  
豈識人間裊促倦祇今匡廬道阻脩雁蕩天台近可遊  
便欲致身丘壑裏挂巾石壁繼風流

甘立

有懷玉文堂

眉山老仙丹丘生三日不出風雨驚玉文深沈發奇秘  
天藻動盪流芳英錦鱗行酒白晝靜金鴨焚香長夜清  
秋深病久不得住撫卷悵望難為情

柯敬仲有晉賢書  
黃庭內景經因以

玉文名堂奎章學士虞伯  
生製文虞亦有天藻亭云

## 高明

### 題支離叟

錢塘門裏支離叟  
短髮蕭疎色鰲垢  
雪霜歲晚結輪囷  
風雨年深增老醜  
挫歲糊解總無能  
欲與冥靈齊上壽  
天公怒此怪且孀  
敕遣靈官下搜取  
勾婁吉利忽飛來  
虎倒龍顛盡灰朽  
女蘿飄騰白鶴去  
琥珀迸裂青羊走  
繁陰已逐謝仙車  
枯榦徒存韋偃手  
邇來好事猶痛惜

歎息形模無復有寧知百年皆夢幻靜看萬變互紛揉  
榮枯相尋無已時成壞有數元非偶南山誰信梓花特  
崑崙俄驚柳生肘朝菌何曾閱晦朔槭樸那知避薪樗  
全軀孰似櫟社樹絮之百圍今在否人生根蒂不可牢  
况為草木計近久野客空歎倚江梅老奴謾泣琅琊柳  
寒煙落日西湖邊衰草荒廬園數畝不見當時鐵門限  
春蚓秋蛇徒蚴蟉元雲飛盡墨池空直寄亭前誰酌酒

王冕

# 水仙圖

寒風蕭蕭月入戶渺渺雲飛水仙府仙人一去不知所  
池館荒涼似無主江城歲晚路途阻解后相看顏色古  
環珮無聲翠裳舞欲語不語情悽楚十二樓前問鸚鵡  
滄海桑田眯塵土王孫不歸望湘浦芳草連天愁夜雨

## 棠梨白練圖

芙蓉香冷簫聲杳月淡煙清楚宮曉仙禽不語雪衣輕  
相逢却恨秋風早土花翠淺霜露蒙山梨小結丹砂紅

玉人醉倒不知處夢回故苑朝雲濃

秋山圖

前年放船九江口秋風獵獵吹蒲柳買魚沽酒待月明  
不知江上青山走三更吹笛欲喚人溥溥白露侵衣巾  
故鄉遙遙書斷絕空見過雁如飛雲去年却下七里灘  
秋水滿江秋月寒子陵先生釣魚處荒臺直起青雲端  
先生不受漢廷官自與山水相桓盤至今高節敦廉頑  
清風凜凜誰能攀泊舟登岸行復止小徑分歧通草市

石林掩映樹青紅正與今年畫相似茅廬半住林木裏  
白狗黃雞小如蟻翁媪無言童穉閒可是太平風俗美  
清谿水落魚蟹新東鄰釀熟呼西鄰相牽相把意思真  
親密不異朱陳民李端筆力乃巧妙寫我舊日經行到  
豈是老夢眩水墨不覺掀髯發長嘯殷家大樓滄江頭  
留我十日風雨秋觸景感動客邸愁便欲卜築山之幽  
斷橋流水無人處添種梅花三百樹直待雪晴冰滿路  
騎驢相逐尋詩去

題申屠子迪篆刻卷

重刻嶧山秦碑二  
石於紹興路學

我昔聞諸太古初馮翊宵宵安可摹自從庖羲得龍馬  
奇偶變化滋圖書結繩之政由此毀科斗鳥迹紛紜起  
後來大小二篆生周稱史籀秦誇李只今相去幾百年  
字體散漫隨雲煙岐陽石鼓土花蝕嶧山之碑野火然  
縱有秦銘刻岑石冰消雪剝無蹤跡書生好學何所窺  
每覽史編空歎息樊山先生東魯儒好古博雅耽成癯  
八分小篆純古法鑿石置之東南隅白光芒爭照耀



滿城走看嗟神妙向來傳寫何足珍棗木空遺後人誚  
徐公手摹烽火塵金陵近刻殊失真那知此本意態淳  
丞相李斯下筆新申屠墨莊有傳授法度森嚴非苟苟  
豈為後學得所師萬世千秋垂不朽

寄太素高士

我昔扁舟上耶溪尋君直過丹井西長松月冷啼子規  
春風滿地芳草齊樓殿玲瓏金碧涌鐘聲不出松雲重  
老猿掬澗山影亂翠禽啄露巖花動此時相見不作難

握手笑上松花壇壇下十萬青琅玕空陰漠漠常風寒  
我對青山論今古青山茫茫無一語知其與我忘爾汝  
石瓢酌我雲根乳冷然使我肝膽清飄裾欲度浮雲輕  
千峰回影陷落日萬壑欲盡松風聲回首谿山忽成別  
幾見江梅飛白雪洞庭湖上聽夜雨仲宣樓頭望明月  
焚焚對景傷古情寸心欲吐書難憑何當相晤一抵掌  
與君細看真蘭亭

息齋雙竹圖

李侯畫竹真是竹氣韻不下湖州牧墨波翻倒徂徠山  
筆鋒移出竇簞谷千竿萬竿清影遠百丈十丈意自足  
就中分取一兩枝別是山陰瀟灑族疎梢颯颯鳳尾顛  
修幹隱隱虬龍伏憑軒忽若秋風來坐使旁人脫塵俗  
我生愛竹太僻酷十載狂歌問淇澳歸來不得翠琅玕  
聽雨冷眠溪上綠而今已斷那時想見景何曾動心目  
便欲為君真致之相對空窓慰幽獨

吹簫出峽圖

巔崖峭絕撐碧空倒挂老松如老龍奔流落峽噴白雪  
石角險過百丈洪我昔放舟從此出牽挽失勢氣欲折  
春風回首三十年至今認得山頭月草堂清晨看圖畫  
畫裏之人閑似我波濤洶湧都不知橫簫自向船中坐  
酒壺茶具船上頭江山滿眼隨處遊安得更喚元丹丘  
相攜共上黃鶴樓

梅花三首

疎枝錯落花燦爛正似推篷谿上看凍痕不剝五更霜

蘚色猶存百年榦孤山處士詩夢寒羅浮仙人酒興闌  
天荒地老行路難誰傳春色來人間君不見江南物色  
今非昔大谷長林盡荆棘歲寒何處論襟期坐對雲山  
空歎息東樓女兒白苧歌西樓美酒喚杏花總有高人  
愛高潔踏雪誰肯來山家老我無能慣清苦寫梅種梅  
千萬樹霜清月白夜更長每是狂歌不歸去只今潦倒  
霜鬢垂世情雜雜俱忘機讀書寫字兩眼眇斷白搔墮  
隨花飛轉首江南隔塵土白月流光雙鶴舞一聲羌管

過南樓鐵石心腸亦淒楚安得喚起陳元龍長船滿載  
玻瓈紅浩歌拍拍隨春風大醉驚倒江南翁

江南十月天雨霜人間草木不敢芳獨有溪頭老梅樹  
面皮如鐵生光芒朔風吹寒珠蕾裂千花萬花開白雪  
髣髴蓬萊群玉妃夜深下踏瑤臺月銀鐙泠泠動清韻  
海煙不隔羅浮信相逢共說歲寒盟笑我飄流霜滿鬢  
君家秋露白滿缸放懷飲我千百觴興酣脫帽恣盤礴  
拍手大叫梅花王五更窓前博山冷么鳳飛鳴酒初醒

起來笑抱石丈人門外白雲三萬頃

昔年曾踏西湖路巢居閣上春無數雪晴月白最精神  
瑪瑙坡前第三樹虬枝屈鐵交碧苔疎花腴迸珍珠胎  
初擬群仙下寥廓瓊瑤玉珮行瑤臺又疑幽人在空谷  
滿面清霜鬢華綠迎風冷笑桃花紅紫紛紛太粗俗  
今年來看秦淮水路隔西湖一千里草堂上是白雲窩  
夜半松風喚予起青山隔世無遊塵雲根粉壁光如銀  
長嘯一聲月入戶孤山處士來相親江南梅花自有主

休問當年何水部  
山僧對我默無語  
柏子無風墮青雨  
關河雪霽圖為金陵王與道題

飛沙羃人風墮幘  
老夫倦作關河客  
歸來松下結草廬  
卧聽寒流雪山白  
悠悠如此四十年  
世情脫略忘間關  
今晨見畫忽自省  
平地咫尺行山川  
鳥道連雲出天險  
玉樹瓊林光閃閃  
陰崖絕壑望欲迷  
冰花歷落風悽慘  
枯槎側側銀河開  
三巴春色隨人來  
漁翁舟子相笑語  
不覺已過洪濤堆  
谿回浦漱石齒齒  
谿上人家成草市



長林大谷猿鳥稀  
小步蹇驢如凍蟻  
西望太白日色寒  
青山削出蛾眉山  
人生適意隨所寓  
底須歷涉窮躋攀  
明朝覽鏡成白首  
春色又歸江上柳  
何如高堂掛此圖  
浩歌且醉金陵酒

趙千里夜潮圖

去年夜渡西陵關  
待渡兀立江上灘  
灘頭潮來倒雪屋  
海面月出行金盤  
冰花著人如撒霰  
過耳斜風快如箭  
叫霜鴻雁零亂飛  
正似今年畫中見  
寒煙漠漠天冥冥

展玩陡覺心神清便欲吹簫騎大鯨去看海上三山青

題夏迪雙松圖

我昔曾上五老峰白雲盡處看青松中有兩樹如飛龍  
正與夏迪畫者同夏迪畫松得松趣箇箇乃是廊廟具  
貞固不特凌雪霜偃蹇猶能吐煙霧蒼髯獵獵如有聲  
鐵甲半掩苔花青六月七月炎火生對此似覺形神清  
丈人兀坐誠有道豈比商山采芝皓有琴有琴不須彈  
而今世上知音少

送无咎遊金陵兼簡丁仲容隱君

長松撼空風怒號門前大水推斷橋山中坐雨六十日  
不知野草如人高今晨出門天氣好眨眼忽驚春事老  
楊花散作雪滿谿送客俄然動懷抱金陵六朝古帝都  
古時風景今何如珊瑚無根土花碧露團玉樹生流珠  
江山無人隔塵土丹鳳不來孤燕語上人脫灑無滯留  
底用登臨重懷古世人往往乘險機老我白髮無能為  
道甫問訊丁令威有鳥有鳥何時歸

蘭亭

東晉風流安在哉  
煙嵐漠漠山崔嵬  
衰蘭無苗土花盛  
長松落雪孤猿哀  
滿地紅陽似無主  
春風不獨黃鸝語  
當時諸子已寂寥  
真本蘭亭在何許  
敬簷老樹綠女蘿  
頽崖斷壁青相磨  
舊時觴詠行樂地  
今朝魚鼓瞿曇家  
荒林晝靜響啄木  
流水潺潺遶山曲  
遊人不來芳草多  
習習餘風度空谷  
去年載酒誦古詩  
今年拄杖讀古碑  
年年慷慨入清夢  
何事俯仰成傷悲  
故人不見天地老

千古谿山為誰好空亭回首獨淒涼山月無痕修竹少  
題墨梅圖

朔風吹寒冰作壘梅花枝上春如海清香散作天下春  
草木無名藉光彩長林大谷月色新枝南枝北清無塵  
廣平心事誰與論徒以鐵石磨乾坤歲晚燕山雲渺渺  
居庸古北無人到白草黃沙羊馬群瓊樓玉殿煙花繞  
凡桃俗李爭芬芳只有老梅心自常貞姿燦燦眩冰玉  
正色凜凜欺風霜轉身西冷隔煙霧欲問逋仙杳無所

夜深湖上酒船歸長嘯一聲雙鶴舞

題月下梅花

平生愛梅頗成癖踏雪行穿一雙屐六花散漫飛滿空  
千里萬里同一色衝寒不畏朔風吹乘興來此江之湄  
繁花滿樹梅欲放彷彿羅浮曾見時南枝橫斜北枝好  
北枝看過南枝老中有一枝更奇絕萬蕊千葩弄天巧  
老夫見此喜欲顛載酒大酌梅花仙仙人怪我來何晚  
一別已是三千年醉來仰面卧深雪夢挾飛瓊上天關

酒醒起視夜何其老烏啼殘半江月

張天英

題趙子固墨水仙

青竹珠簾人似玉霧鬢風鬟綴靈粟一吹誤翻金叵羅  
香濕群仙翠樺燭龍國朝回八風舞鳳池醉度淩波曲  
瑤瑟雙歌李白詞馮夷捧出蘭縑綠

題淩波飛蓋圖

蕊珠宮人駕雲軿山中翠蓋何亭亭老龍飛蓋作風雨

八仙池上爭娉婷金環瓊珮裒薇露雙成躡墮青鸞翎  
酒星入水化為石寒玉夜語天泠泠白瑤城闕三萬里  
月照影娥行洞庭

玉山佳處

玉山有佳處迺在崑崙西蓬萊數峰小上與浮雲齊雲  
中飄飄五色鳳只愛碧梧枝上棲芝草琅玕滿元圃群  
仙共躡青雲梯太湖三萬六千頃水水流入桃花溪溪  
頭浣花如濯錦百花潭邊浮紫泥紫皇拜爾山中相閒



把絲綸草堂上漁莊一釣得龍梭  
龍女吹簫書畫舫西風玉樹金粟飛  
東風柳浪金波漾歲歲年年樂事多  
綠野平泉何足尚十二樓前看明月  
太乙明星夜相訪酌霞觴瑶臺露濕  
芙蓉裳我亦桃源隱居者握手一笑三  
千霜

郭翼

白雲母

青田生鶴子隨母青田飛母飛向天去  
玄裳縞其衣千

年歸來華表鶴鶴雛悲鳴西日落好將商墓寺前雲飛  
還直過青山郭

美人圖

鬱金殿前楊柳新長門草色春復春下階微微動香步  
波影晴光流素塵翠釵蜻蜓凋玉佩攬髻迴風舞裊帶  
合歡花落無好枝伯勞單飛鶯亂啼玉音夜夜宮車絕  
露點蒼苔怨明月

書聲齋詩為姚子章賦

幽人一室開風露坐想瀛洲玉為署把書夜誦秋滿空  
徘徊花影蟾蜍樹蓮葉艇子風泠泠太乙夜照藜火青  
笙簧萬耳洗不醒謬哉太音誰得聽

張世昌

五洩山

兩崖鑱天不容舳玉龍噴壑翻雲濤冰山滾下白石碎  
雪浪捲起銀臺高天風吹寒草木凍六月飛霜灑陰洞  
青蛇跳出一線長赤口傾波渴雲夢雲奔雷激趨羣靈

天關咫尺通幽冥巖頭好借一勺水六合盡洗塵埃清

玉女洞

星官何年遊太清飛來化作高崖青天地無心蘊精巧  
造化有迹通幽靈神剜鬼鑿妙鐫削瑤臺清冰出萬壑  
劍光穿斗射龍文元氣蟠空孕西角東南宇宙煙濛濛  
卞和夜泣空山中何人更施補天手為我獻入明光宮

洞巖山

石樓突兀開仙宮海上駕出金黿峰龍窩久蟄雲霧冷

蟻穴或作王侯封嵌空深入九地底虛壑颺颺朔風起  
冰絲有淚泣鮫珠碁局無聲敲玉子六丁鑿斧光精瑩  
我欲鏟破陰崖扃火輪飛出天雞鳴萬國同照陽烏明

家公萬柳堤

會稽西南山萬岑西來水多愁太陰長鯨翻身海底出  
家侯築堤留至今家侯之功何可及汙邪如雲萬家邑  
翡翠煙收穀雨晴鯉魚風起鯨波發道傍古木鐫遺銘  
千古萬古存幽靈百川無停功不息東望禹穴雲山清

靈女臺

靈女臺前草深尺靈女幽姿化為石石室深藏羽蓋青  
玉衣半染苔痕碧巖頭雨氣秋紛紛夢魂不作陽臺雲  
飛行宇宙星霧濕呼吸造化風雷奔丈夫意氣真自許  
女子英靈亦千古更須為刻邯鄲詞不獨中郎誇幼婦  
鼓吹峰

清都廣樂聞瑤京鼓吹自作天機鳴八龍逶迤九鳳舞  
珠樓貝闕秋冥冥航塢之山起寥廓天人啟閭泄闢鑰

風簫雨瑟煙霧寒天上時聞鼓天樂鳳凰一去三千秋  
唐虞世遠夔龍愁航塢山頭跨白鶴我欲與爾釣天遊  
何儒行

興嶺汪公仲雲松樓

黃山插天紫翠浮三十六峰明素秋奇秀蜿蜒結興嶺  
嵐光晴擁雲松樓樓中主人愛山色閒居不為軒冕求  
松林雲去松自綠雲來松林雲滿谷主人看松卧雲屋  
靜聽松風清可掬君不見歲寒貞松飽雪霜材大青雲

成棟梁

朱斌

題趙彥徵畫

玉堂學士之孫子文雅風流世無比  
漚波亭上客關時  
戲寫吳興好山水遠山疑是弁山青  
近山金蓋與雲平  
兩峰翠峙勢如削中有滉漾雙溪清  
溪上村村桑柘綠  
橋下修林覆茅屋春風酒熟雞豚肥  
野老過從少拘束  
邇來風塵十載餘可憐樂土皆丘墟  
只今獨有苔溪上



有水有山如此圖  
吾生頗識山林趣  
按圖擬問田園計  
何時長嘯來山中  
與君放曠人間世

李澗

陳知州子侍父歸賦此以贈

白日上漢臯  
落葉鳴蕭蕭  
之子遠行邁  
相送城南橋  
橋頭涼風動  
疎柳車蓋搖  
搖搖赴京口  
而翁太守予交久  
惜別青山入樽酒  
黃花未放秋  
不知雁影空江暮  
回首後夜相思山  
月明湛盧神劍蛟龍吼

黃公望

王摩詰春溪捕魚圖

春江水綠春雨初好山對面青芙蓉渠漁舟兩兩渡江去  
白頭老漁爭捕魚操篙提網相兩兩慎勿江心輕舉網  
風雷昨夜過禹門桃花浪暖魚龍長我識扁舟垂釣人  
舊家江南紅葉村賣魚買酒醉明月貪夫狗利徒紛紜  
世上閒愁總不識江草江花俱自適歸來一笛杏花風  
亂雲飛散長天碧

題倪雲林贈耕雲東軒讀易圖

君家書屋鎖閒雲庭前叢桂吹清芬東軒虛敞坐涼夜  
撲簾香霧來紛紛金吹不動露華潔月裏仙人降瑤節  
奇葩點綴黃金枝靈種移來白銀闕秋林瀟灑秋氣清  
千竿脩竹開前楹自是燕山尚清貴不與桃李爭芳榮  
花下詩成日未盡更喜幽人往來近清絕何如元鎮圖  
應識耕雲是高隱

方方壺松巖蕭寺圖

浩渺滄江數千里幾幅蒲帆挂秋水曉風吹斷綠蘿煙  
百疊青峰望中起梵王宮闕倚雲開七級浮圖倒影來  
山人久已謝朝市日踞江頭百尺臺松篁叢雜多啼鳥  
隔岸人家九彈小此圖此景入天機誰能髣髴方壺老

吳鎮

右丞春溪捕魚

前灘罾兮後灘網魚兮魚兮何所往桃花錦浪綠楊村  
浦溆忽聞漁笛響我行笠澤熱此圖頓起桃源雞犬想

不如歸向茅屋底老瓦盆中醉春釀

洪谷子楚山秋晚

洪谷仙去五百年丹青流落何翛然九疑之山何突兀  
亂雲慘淡秋風前尋幽忽有蓬萊仙歌聲隱約清溪邊  
蕭蕭木葉下無際不見歸來張季船前村後村高復下  
遠渚近渚斷又連夕照遲遲俯西川樹底人家起碧煙  
卷中妙境無窮已揮毫聊爾紀新篇

郭忠恕夏山仙館

蒼厓過雨流青玉萬朶芙蕖紅間綠松枝搖動碧簾風  
蘭舟徐度迴塘曲畫閣朱樓設翠綸銀床冰簟上流蘇  
美人繡倦頻來往仙侶長吟聊自娛羽扇不揮塵不到  
博山麝腦香猶裊新蟬驚破北窓眠幽禽啼斷林間巧  
竹煙浮翠薦龍團樹影當庭映日圓晚來兩兩尋幽客  
應識溪聲六月寒圖中景物非人世如此丹青誰得似  
屈指流傳四百年宣和賞識標忠恕人間何處無炎歎  
火雲照耀未能消高齋展對殊未已一片涼颼落素綃

李成江村秋晚

咸熙畫圖無與共傳世希微愛者衆二李之後已寥寥  
宣和當日尤珍重新圖一旦落人間神宮寂寞何時還  
經營意匠出塵表上下五百誰能攀水迴中有漁舟泊  
山頂崇臺招白鶴籬根浮出水潺潺萬竹琳琅奏天樂  
霜飛木落一天秋棲禽向晚聲啾啾柳溪錯認淵明宅  
過橋豈是王弘儔景色蕭條如太古路僻村深貯煙霧  
分明再見輞川人蕪詞何敢輕為附清容自是鑒賞家

持將却向天之涯幾回試展未能去落盡庭前無數花

米友仁畫卷

元章筆端有奇趣時灑煙雲落縑素峰巒百疊倚晴空  
人家掩映知何處歸帆直入青冥濛曲港荷香有路通  
更愛涪翁清絕句相攜飛上蓬萊宮

竹窩

阿香怒鞭籜龍尾斑鱗蝕去痕未洗天風吹作萬琅玕  
翠壓脩林收不起林深有客棲寒煙玉版已悟禪中禪



人間赤日迴不到著我六月秋冷然青雲欲飛霖雨急  
佩環聲裏雙娥泣玉簫驚起老龍眠夜染瀟湘半江碧  
水墨梅松蘭竹四友圖

硯池漠漠吐墨汁蒼髯呼風山鬼泣濤聲破夢鐵骨  
冷露影溥空翠毛濕徂徠百畝老雲煙湖山九里甘蕭  
瑟何當置此明窓下長對詩人弄寒碧

野竹

野竹野竹絕可愛枝葉扶疎有真態生平素守遠荆

榛走壁懸崖穿石埭虛心抱節山之阿清風白月聊  
婆娑寒梢千尺將如何渭川淇澳風煙多

題青山碧篠圖

青山白雲繞碧篠蒼煙迷幽人日無事坐聽山鳥啼  
鳥啼有真趣對鏡看山隨所遇乾坤浩蕩一浮鷗行  
樂百年身是寄

筍

綠陰晝靜南風來晴梢拂拂煙花開籜龍走地牙角出

班班玉立橫蒼苔長鏡穿雲石路滑錦衣脫裊玉版白  
鳴牙未下水雪壑開籠先放揚州鶴

時至正七年竹醉日

### 黃鎮成

### 桃花巖

小僉山中數塊石上出浮雲幾千尺寒泉飛下絕澗響  
老樹倒挂蒼苔壁巨靈擘斷知何年中有古洞藏神仙  
蓬萊宮闕浩杳靄世外別有壺中天巉巖磊砢相緣入  
雲霧晦冥光景集丹房石室淨無塵虎攫龍拏半空濕

山人舊說桃花巖山高水絕無由探我來正值巖花發  
長嘯獨倚春風酣同遊雅士貪幽趣自劬山雲燒筍具  
兩山流水一川花依稀似是桃源處世上紛紛吹戰塵  
山中道人都聞欲從君住不可得一聲孤鶴唳空雲

題墨菊

江南九月秋風涼秋菊采采金衣黃近時丹丘出新意  
却灑淡墨傳秋香青城學士曾題藻散落人間共傳寶  
卷舒造化入毫端回首東籬自枯槁東陽傳君心好奇

何處得此秋霜枝湖湘衲子遠相貺筆勢迴與丹丘齊  
香英細感元玉屑老幹拗斷烏金折不隨粉黛學時妝  
自與幽人同志節淵明已逝屈子沈晚香縱有誰知心  
感君畫圖三歎息為君長歌楚天碧

李存

次韻戚總管賦雪

長風翦水不成片城上將軍鐵為面五更吹角墮梅花  
天女騎龍淚如霰坐令萬瓦白參差人在蓬萊水晶殿

黃河夜合鼃鼃深太行曉裂豺狼戰尚憐廬阜足佳致  
五百寒僧不開院崑崙朔南日本東未信天花一時遍  
寒邊勒馬公所閑橋上騎驢吾不倦工作巧本容易  
臘盡春臨已三見明知無酒俱冷落豈有多情更歡宴  
長安市上一貧士白晝閉門何所羨

義魚

霜風刮面冰如刀持義入江矜厥豪投深中義始一出  
眼澀膚凍如紅桃嗟爾得食亦稍稍性命或與蛟龍遭

安得長叉一萬丈直向海中叉六鼃

祝丹陽以古琴見惠且寄以詩次韻荅之復以  
史略一本為謝

涼風蕭蕭吹井桐佳懷如寶千不逢二年蹤跡走闌闌  
面目土炭心盲聾其茲豈異伏櫪馬雲漢獨羨高飛鴻  
詩琴遠致心甚厚金玉備具相玲瓏大珠沈淵炯不動  
朗月照水清欲空亦知廬阜入幽夢幻此三疊銀河風  
紛紛醉裏不知老有此二美誰吾同彈琴固可消世慮

作詩乃或令人窮未知祝仙古巖下往往遇會方瞳翁  
聊將史畧報深意并問馬首何時東

胡天游

途遇大風

客子南遊日欲落觀溪橋頭風色惡砲車雲外天為昏  
走石翻江吹倒人橋頭翁嫗邀我宿呼酒張燈傍僮僕  
夜深撫榻不成眠琴瑟餘威振茅屋明朝風定天宇白  
一笑促裝三歎息邇來平地多風波不獨江頭阻風客



石牛寨

癡牛偃蹇不服箱  
天風吹落千仞岡  
明河在望歸不得  
化作山頭一拳石  
皮毛剝落封苔錢  
千古萬古眠雲煙  
嗚呼安得秦鞭起  
殼棘短衣歸種汶陽田

寓館食蘆戲主人

蕨芽成拳筍作竿  
園松卧壟春告闌  
寸心生意老猶壯  
鬱鬱競長青琅玕  
筠籃擷翠風露濕  
瓦缶釀碧虬龍蟠  
開緘曉試膳夫手  
寸斷日送先生盤  
堆金疊玉光璀璨

未許苜蓿誇闌干，鏗鋸拒齒發鈞奏。  
甘脆適口回儒酸，填胸一洗鮭鱐惡。  
頓覺肝膽生清寒，朱門淳熬腐腸藥。  
何異鴆毒生晏安，虀鹽送老本吾分。  
一飽已拚如窮韓，幸無羸角蹂吾圃。  
祇有蔬糲同盤桓，未知餘生消幾甕。  
俯仰日月雙跳丸，明當更作冰壺傳。  
大笑出門天地寬。

張師曾

送南康先生

眼底讀書猶貫魚，談經不窮照乘珠。  
有時光采生海隅，

龍駒自是日千里汗血分槽五花起欲逢伯樂鳴未已  
歸舟行處滄瀟香明鏡無塵秋薦涼五老相迎何蒼蒼  
梅致和

獨馬圖

西域之西生良馬丹青何年入圖畫良工不必問誰何  
只此毫鋒便瀟灑肉駿汗血形如龍權奇肯與駑駘同  
迥然獨立生長風自信不受金羈籠老驥猶能志千里  
况此昂頭渴鳥勢聖朝捐金市駿骨宜向天閑驂六轡

何景福

和薩里平章遊東安汪伯諒半山亭詩韻

丹溪青山冠閩浙勝遊忽聚金臺客朱闌碧檻倚雲隈  
滿地松花踏香雪玉京北望蒼煙重山光水色開天容  
咳唾隨風落珠玉蒲萄酒豔玻璃鍾逍遙聊作無事飲  
倒著接羅從醕酎潮生眼纈春風和月上松蘿酒初醒  
金閨公子玉堂仙長歌擊筑音琅然君不聞香山老子  
長短三千篇一金一首鷄林傳

畫魚

粉垣皎皎雪不如道人為我開天奇  
長杠運入霹靂手墨池飛出龍門姿  
雲煙鬱律出半堵下有洶湧波濤隨  
錦鱗隊隊晃光彩揚鬚掉尾噉喙吹  
相忘似識湖海闊肯與蝦蟹相娛嬉  
由來至理與神會潑刺健鬣直欲飛  
嗟予久縮釣鼇手卒見欲理長竿絲  
張僧繇任公子不須點龍睛不須投  
糖餌禹門春浪拍天流只要雷公助  
燒尾

項炯

題趙子固水仙

龍波乍起湘雲濕  
帝子欲歸歸不得  
十二煙鬟遙點碧  
到今愁魄寄湘花  
畫出深秋雲繞筆

潘純

桐華煙為吳良賦

常聞吳剛上天去  
手斫嫦娥宮裏樹  
調向人間作散仙  
陽羨州中水邊住  
曾見玉兔杵元霜  
三生悟得燒墨方

墨成得錢即沽酒那知世有白玉堂百年生計萬慮息  
身不求知名四集卧吹長笛看青天歲掃桐煙三百石  
周郎昔斷長橋蛟腹中有白凝為膏石牀暖傾玉髓滑  
竹屋夜倒山月高江南李墨人共惜安得今人不如昔  
君看鬱鬱欽州山山上青松盡千尺

唐登

靜安八詠

錄四首

陳檜

禎明老檜高百尺十畝蒼寒浸苔石虬枝偃如東向松  
霜皮慘若西來柏金陵王氣當時誇落日江村啼亂鷄  
壁月滿天清夜靜玉簫吹落後庭花

鰕子禪

誰云儼師示化所餘香未絕天花雨癡禪狡獪悉共知  
嚼啐紅鬚化龍舞癡禪化去鰕亦存至今法門無盡燈  
風雨幾度驚山靈庭前柏樹猶青青

滬瀆壘



吳淞江上袁公壘千年何處尋遺址石犀半落江水中  
秋老蘆花三十里五百馬塵今尚飛啾啾赤子將安歸  
月明古堞急鼓輦孤臣有淚空沾衣

綠雲洞

海村古洞雲連霧洞門春曉松花雨寒綠風生玉兔房  
團光露濕金鷄樹隔林鳥聲無處尋空堂苔響如敲金  
綠雲仙人解招隱我欲避世投冠簪

沈鉉

送仲溫先生還吳

江城蕭索西風起行逢故人驚夢裏憂深自覺少容顏  
食盡惟愁拙生理看君白髮何由得白髮相逢更悲喜  
筆力隨年老愈深詩思逼人鳴不已每呼石丈即低頭  
獨寶蘭亭誇未死近來英氣減前時酒量寧非向來比  
從渠門第沸如羹自保情懷淡如水城南只友高書記  
謝官歸來接鄰里交遊散落苦無多世事悠悠竟如此  
明朝忍去別江頭楓葉蘋花送行李

沈存

懷友人徐伯貞

去年秋風捲黃埃美人躍馬沙邊來  
今年秋雨灑白日美人遠上黃金臺  
黃金臺下燕山道漠漠寒雲接衰草  
雁飛不斷青天長長使征人路傍老  
美人美人胡不歸清霜凋盡珊瑚枝  
臨風三歎思欲絕悲莫悲兮生別離

陸侗

靜安八詠錄一首

蘆子渡

蘆村胥村南北路舟往舟還今古渡一笠天隨紫鳳飛  
百枝水落青龍步鯉魚風起夜未收雪色蘆花零亂秋  
借得君山第三管月中吹過滄浪洲

林彥華

八臺詠

錄二首

歌風臺

芒碭雲氣高崔嵬山東噫氣聲如雷睢陽拔木真細事

天遣吹暖秦坑灰沛中小兒強解事擊筑高歌攬鄉思  
周南正始風化行可惜歌中無此意伯心之存良可知  
五葉變作秋風辭

戲馬臺

白蛇夜斷飛赤龍長驅疾足平關中鴻門玉碎亞父死  
彭城霸氣隨飄風沐猴御事真成戲調服群鴛棄天驥  
一騅豈解踏九州事去空歌時不利宋公不復登此丘  
弔古有客悲黃樓

汪澤民

翠微寺

欲雨不雨天墨色將崩未崩石偪側溪谷緣雲已萬盤  
風雨欺人作三厄客遊已慳天不慳雷電翕歛噓晴暎  
諸峰倒景互明滅照耀金碧開山門清都紫微逼象緯  
旃林貝樹羅山樊十方下視沙界迴佛骨不受炎歊裨  
麻衣老師寂滅久問法羞與山僧論但餘卓錫古泉水  
念念欲洗塵眼昏嗟予世網久躑躅坐覽古跡空盤桓

暮歸却覓山下路杳杳飛鳥投荒村

鄭玉

題洪氏舫軒

山人愛舟屋亦舟山中便作滄海遊何須風帆冒險遠  
東西南北窮遐陬向來此是荊棘地今日遂作江湖秋  
門前嵐霧靄蒼翠渾疑江上煙波浮雲旋日動屋移影  
舟行岸轉曲江頭主人自是濟川手坐令涉險如安流  
復有佳客天下士作記寫出清絕幽王先生詩繼二雅

五字萬里爭追求徐公翰墨妙當世夜深光彩射斗牛  
世間尤物自足貴安用航海珠玉謀誰當共此樂朝夕  
窓外忘機兩白鷗

蔡廷秀

武夷山

去年遊羅浮鯨波浴日三更秋今年遊武夷龍湫翻雪  
九曲池平生足跡山水窟二山冠絕天下奇早年南北  
幾去來太行祝融窮天台石門雁蕩今回首風斯在下



生塵埃曾孫宴罷幔亭頂神仙果有即此景何須世外  
尋蓬瀛斫藤縛屐崑崙嶺天風吹我上一曲濕雲粘脚  
莓苔綠一村仙子指二曲溪峰有女顏如玉釣臺三曲  
凌天扃仙舟濯破赤石城四曲嵐光翠欲凝雲車洒雨  
開新晴羣仙知我經仙後天孫召飲石上亭軒皇渺遺  
響泉聲寶瑟浮湘靈子喬撫鋏笛麻姑玉笋顛倒傾西  
母瓊桃熟安期棗瓜生初平有羊鞭白石可教無魚羹  
青精舖我食且飽飲我醉未醒欲從五曲窮九曲白雲

卷三十一  
滿目生親情好山豈不欲終日食焉急事俗病縈天仙  
笑騎白鶴去何處委羽雙幘零我亦醉下山之岡恍然  
人世心蒼茫東方鬱鬱覩佳木紫陽清風吹隳網中天  
皎皎日月長桃源此去從荒涼

潘伯修

靈山

玉環諸山靈山深環以大海根太陰空青水碧澹相映  
散為風露來蕭森嗟予賦命落台雁調笑魚鳥成滯淫

南遊華蓋動連月勝地在近徒歆歆風帆徑渡不再宿  
綬裏長劒攜青琴種榆瓊田中吹笙玉山岑吾將於茲  
養年命岐路四斷誰能尋

李祁

奉題朱澤民先生畫山水圖

洞庭之南湘水東青山奕奕蟠蒼龍雲陽峰高七十一  
欲與衡嶽爭為雄我家近在雲陽下來往看山如看畫  
十年塵土走西風每憶雲陽動悲咤吳中勝士朱隱雲

筆精墨妙天下聞畫圖畫出湘江水青山上有雲陽雲  
雲陽山高湘水綠十年不見勞心目只今看畫似看山  
萬里歸情寄鴻鵠

陳麟

題歸去來圖

飛泉十尺銀河懸孤松石上蒼龍眠四山無數白雲出  
五株衰柳當門前葛巾丈人步其下悠然別有山中天

龔友福

濮山丹洞

濮公曾此學神仙飛騰一去千餘年  
欲窮勝境訪偉蹟但遺丹井清泠  
泉蒼山翠律枕淮水雲崖古洞埋  
雲煙神仙茫茫不可詰往事獨見  
居人傳羽衣接跡千載後結菴構  
宇當巖前巖前種藥草自異青松  
翠柏高參天自慚汨汨走聲利登  
臨此地空留連

陳基

送李景先錄判

閭門柳枝短君行不可緩贈君不折楊柳枝勸君飲此  
金屈卮丈夫將身誓許國安用當歌傷別為青絲絡鞍  
黃金勒遊宦鄱陽山水國何處春風最憶君琵琶洲上  
蘼蕪碧

潼關

河渾渾關嶢嶢太古以來神禹鑿前車未行後車却去  
馬一鳴來馬愕自從虎視繼龍興周道不復如砥平至  
今惟有秦川路千里秋風落葉聲

寄姚子章

聞君又作錢塘客多在青樓少泉石佳人姓蘇名小小  
占斷西湖好春色沙棠為舟桂為槳驚起鴛鴦飛兩兩  
有時醉倒百花間不記六橋新月上行樂須當少壯時  
英雄自古皆堪悲歸來莫負張京兆鸚鵡窓間喚畫眉

織錦圖

佳人織錦深閨裏恨入東風淚痕紫三年辛苦織迴文  
化作鴛鴦戲秋水秋水悠悠人未歸鴛鴦兩兩弄晴暉

料應花發長安夜不見閨中腸斷時

僕嘗夜夢從彥成飲彥成曰此荔枝漿也飲之  
令人壽子能為我賦之當贈三百壺予自口占  
一詩覺乃夢也及會玉山聞彥成釀酒果名荔  
枝漿以夢白之不覺大笑玉山曰君當書此詩  
吾當與子致酒以質所夢因莞爾書之彥成見  
之必更一笑也

涼州莫謾誇葡萄中山枉詫松為醪仙人自釀真一酒



洞庭春色嗟徒勞瓊漿滴盡生荔枝玉露瀉入黃金卮  
一杯入口壽千歲安用火棗并交梨不願青州覓從事  
不願步兵為校尉但令呼鶴共呼鸞日日從君花下醉

新郭

扁舟夜泊新郭市石湖水深清且泚長嘯一聲天地秋  
萬壑驚風泣山鬼匡廬生玉山子意氣相傾誓終始呼  
童沽酒烹錦鯉醉入蘆花月如水周郎放歌踏船尾我  
亦和之聲疊疊明月照我心秋水洗我耳富貴亦何為

人生行樂爾城中黃塵眼為眯安得置我丘壑裏

張憲

唐五王擊毬圖

興慶宮前春正熱綠楊夾道花如雪毬門風起日西斜  
五馬歸來汗成血潞州別駕醉眼纈雙袖傾欹擁岐薛  
申王按鞚宋王馳杖撲毬囊手親挈草平如掌馬力均  
玉鞭十里不動塵黃門扶入五花帳大衾長枕姁家人  
花萼相輝雨氣寒樓中歌管漸闌殘紫騮不踏毬場路

萬里青驪蜀道難

中秋碧雲師送蟹

天風吹綻黃金粟簷前老兔飛寒玉客窓不記是中秋  
但覺鄰家酒漿熟沔田秋霽稻未鎌葦箔竹斷收團尖  
紅膏溢齒嫩乳滑脆美簇簇橙絲甜無腸公子誇矍鑠  
兩戟前驅終受縛靨心晝煖白玉臍夔牟夜泣紅銅殼  
麴生風度亦可憐且對霜娥供大嚼酒後高歌遶碧雲  
九峰一夜霜華落

青山白雲圖

青山青青白雲白一尺小溪千里隔扁舟  
棧岸不見人鷄聲何處秦人宅桃花流水春  
粼粼不識人間有戰塵  
待得紫芝如掌大歸來甘作太平民

陳秀民

壬午九月九日與郭希仲紀叔維馬希遠飲周  
景父晚香堂上紀畫墨菊馬鼓琴既而各賦一  
首

去年登堂三月三主人置酒澆春衫今年登堂九月九  
堂上主人復多酒馬生彈琴紀生畫郭子題詩美如炙  
四明狂客醉欲倒菊花插帽秋光好百年節序能幾逢  
人生會合何其少人生會少將奈何為君起舞為君歌  
歌殘酒盡更須酌莫待他年白髮多

題幻住菴中峯和尚蓮池野亭小像

亭前池水生蓮花亭中老禪方結跏雙枝作供淨瓶裏  
彷彿玉井銜丹霞世上蓮花亦常有玉堂不比丹青手

水底冰蠶已化龍絕世於今故無偶師是蓮花花是師  
亭亭淨植涅不溜胸中五色舌上吐爛漫寫出蓮花詞  
世間物物皆為幻我把斯圖作真看君不見中峰峰上  
十丈蓮吹香夜夜到諸天

蘇大年

雷塘

吳公臺下雷塘路錦纜牙檣行樂處當年玉樹後庭花  
夢裏相逢惜春暮君不見東家北舍人未歸落花滿地

蝴蝶飛

方行

題吳彥嘉所藏張秋蟾龍圖

張公畫龍人不識筆法遠自僧繇得挂向高堂神鬼驚  
恍忽電光來破壁想當渤海開筆力元氣淋漓浸無極  
吞吐日月天地昏摩蕩雲雷太陰黑江翻石轉窈莫測  
雪濤卷空銅柱側洞庭扶桑非爾誰顛倒滄溟為窟宅  
乃知前圖只數尺坐令萬里起古色何當置我君山湖

上之高峯聽此老翁吹鐵笛


卷三十一

御選元詩卷三十一



謹案卷三十一第三十三頁後二行薩里舊作散  
里今改





總校官庶吉士臣侍朝

校對官檢討臣蕭九成

謄錄監生臣朱文佐